

## **Predgovor drugom izdanju**

Ekonomski fakultet u Sarajevu je od školske godine 2005/06 prešao na novi „3+2“ koncept studija zasnovan na principima Bolonjske deklaracije.

Novi nastavni plan i program, zajedno sa silabusima predmeta, kreiran je u prvoj polovici 2005. godine, a prva generacija studenata po novom programu upisana je u julu iste godine. Pravni osnov za početak rada po novom konceptu studija bio je baziran na odredbama „Privremenih pravila studija“ donesenim na Senatu UNSA u septembru 2005. godine. Zbog kašnjenja u donošenju odgovarajuće zakonske regulative (kantonalni, federalni i državni nivo), cjelovit informacijski paket objavljen je u aprilu 2006. godine.

Usvajanjem novog „Zakona o visokom obrazovanju“ na nivou Kantona Sarajevo (septembar 2006. godine), kao i „Okvirnog zakona o visokom obrazovanju u BiH“ (juni/juli 2007. godine) stvorene su zakonske pretpostavke za potpunu implementaciju novog koncepta studija.

Imajući u vidu orijentaciju Fakulteta ka kontinuiranom poboljšanju kvaliteta programa, procijenili smo da iskustva stečena u protekle dvije godine izvođenja nastave po novom konceptu studija već predstavljaju osnov za unapređenja određenih rješenja u prvoj verziji programa/informacijskog paketa.

Fakultet je tokom protekle tri godine angažirao neke od vodećih evropskih autoriteta iz oblasti ECTS-a i akreditacijskih sistema u cilju dobivanja ocjene novih programa i načina rada. U tom smislu, gosti-predavači bili su vodeći ljudi krovne evropske organizacije za osiguranje kvaliteta poslovnih i menadžment studija (EFMD): Prof. dr. Eric Cornuel, generalni direktor EFMD-a, Prof. dr. Paul Verhaegen sa Rotterdam School of Management (sada na Technical University Eindhoven) i Prof. dr. Maks Tajnikar, dekan Ekonomskog fakulteta u Ljubljani. Također smo određene sugestije dobili kroz kontakte sa drugim fakultetima/ univerzitetima koji imaju značajna iskustva u implementaciji ECTS programa i međunarodnu akreditaciju (RSM, Vienna University of Economics and Business Administration, Ekonomski fakultet u Ljubljani, Vienna University, Ghent University,...).

Urađene izmjene imaju za cilj da poboljšaju kvalitetu studija na Ekonomskom fakultetu i budu osnova za dobivanje međunarodne akreditacije dodiplomskog programa.

S poštovanjem,

Prof. dr. Muris Čičić

Dekan Hercegovačke, Sarajevo

Sarajevo, septembar 2007. godine